



國朝文類卷第五十五

墓誌

國子司業滕君墓碣銘

姚燧

觀漢諸碑凡門生為師作者其文多稱在三之義
蓋本樂恭子民生於三父生師教君食惟其所在
為言又列郡邑姓名字官人出幾何錢於碑陰多
至百人或倍之令人每興今無古者篤於其師之
慨至大己酉燧長翰林之明年國史院編脩官東
平蔡文淵狀其師國子司業滕君之行與門生許
質求表其所以君之再入成均橫經丈席者嘗數

百人礮石所資一不偕人出二子獨加異乎古豈
不於在三足校浮俗斯時耶君諱安上字仲禮其
先自洛徙中山不可推采其世考府君某隱德委
吏斗食自捐生君八年而不祿妣李夫人撫君誨
曰而性質開朗記識兼人且金名士趙燦離孫不
可以貧廢學感聖善言師西巖君克自砥礪勤心
聖學暨其長也尊聞行知如不足日私居自持衣
冠齊遼及出接物一誠以和郡無少長相謂不字
咸稱先生學積其躬道行其家化及其鄉府臣歸
高薦名於朝勅教中山是府多士求親輝光馨歎

欲聞鼎鼎其來服縫掖者將半齊魯庭臣善其職
士有聞用以職民主禹城簿歷於爲監爲令與丞
刑或過中必揆以義馴馴上說不使黜涅妄加疑
盜廢棄永世仁譽既章宣司所臨若縣與州事有
未竟必檄往治裁中情法守令憚之出將入迎若
事大吏徵爲國子博士以其平昔自律爲先早作
晏休誨誘諄諄發蒙疏疑立懦尅剛各因其才矯
拂於善黨坐羣行齒而序之其極弗率其黜與朴
成均作則井然有條即升監丞再丞太常世
祖賓天成宗繼序圓丘請謚太室升祔凡厥禮

文酌古損今皆所訂稽元貞之元拜監察御史京師地震上疏曰君失其道責見於天其咎在內庭竊干外政小人顯厠君子名實混淆刑賞僭差陽爲陰乘致靜者動宜兢兢祇畏側身修行反昔所爲以盡弭之之道其說累數十百言反覆深切有司不敢以聞君則曰吾不得於言者遂委印去反關其家著書自怡尋起爲國子司業時已疾矣顧言其子治喪無用二氏以其年乙未夏六月廿有五日卒年五十四葬府城東南崔丘里爲文一本理義辭旨暢達不爲險譎非有裨世教者不言有

東菴類藁十五卷故江西廉訪使趙秉政板之行世矣又有易解洗心管見藏之家亦多乎哉其不年者世同哀之而文淵猶以不侍經筵職絲綸謀廟堂爲憾嗚呼夫旣師成均官奉常歷臺諫而又

有德有言足矣奚必兼彼數者始爲至耶夫人李氏貞順柔嘉姻里範焉後君八年卒子翊去尉東明自致終喪亦足彰君刑家之自今尉元氏兄羽有文行蚤世銘曰

孰不曰士于學始志迄用有成千百一二允矣滕君敏脩篤行鍾鼓衡門益大其聲勅起布衣于定

敦教祁祁縫掖來則來效再主禹城簿領勾稽不
枉刑墨仁聞日躋滿秩而招人爲胄監由博而丞
俊髦是範轉而奉常禮文斯綱或革而因酌檢局
章遷拜御史爲帝耳目言責塞求龍鱗逆觸一不
見入納履而行反關立言行後是程方微司業年
過知命遽啓手足理也莫竟短者已而其長斯存
何以貞之石有諫言

河南道勸農副使白公墓碣銘 姚燧

彥隆始由太原徒行至河內致其父書魯齋先生
願游其門未有介也乃因吾友翰林侍讀高凝

操几杖主凝家二年而歸待其親而先生亦召址
矣尋由避宅左揆以集賢館大學士祭酒國學教
貴胄乃奏召舊弟子散居四方者以故王梓自汴
韓思永蘇郁自大名耶律有尚自東平孫安與凝
燧燧自河內劉季倫呂端善劉安中自秦獨公自
太原十二人者皆驛致館下三年吾儕或病告官
去而先生亦浩乎其歸乃奏有尚與公從仕郎
子助教昔者貴胄友也一旦能橫經下心事之爲
師屬非其道聳是曹不可得其馴然北面俄侍
裕廟東宮公爲講鄭伯克段于鄆已講而出

裕廟語人曰是非空言意固有在也以國史院編
修從仕郎仍助教擢奉訓大夫監察御史發阿合
馬賊國諸不法彼顧誣公糾摘非實捕送刑部獄
引隣婦有色者教誣公嘗竊往來怒隣婦力明其
無有鞠之墮孕而事始白又糾鷹師西京宣慰使
劉刺沙以已憾殺其幕僚凡是皆庸懦縮首危者
而峻風節者咸偉之出兪陝西漢中道提刑按察
司事燧亦爲其道副故得詳西土所爲其按歷皆
分燕游荒寒諸州南而褒鳳金洋北而綏麟葭丹
龍門西河絕崖高可去水百尺止通一騎必

道導者先之有來騎使駐之寬所卒至則兩不可
班視燒棧猶車衢也如是之地皆周焉制度卒有
反者不即覺捕惟罪杜長監郡與憲司麟州人告
陰濟民乘馬疾馳其識仇也問曰所懷何書濟民
給以反書仇上變延安延安移文吾憲公又請往
治之所牽連二百許人繼燭治之再旬是州小僻
無紙至覆舊案以書適近侍臣括馬其州館鄰墻
也聞獄吏呵問終曉得公姓名歎曰世有克勉其
職如斯人者使人勞苦之曰吾見陛下當首聞公
竟白濟民無佗特杖其給仇非宜言者公位憲諸

君下會王相府伯不花右丞勲臣子開省京兆特
異禮公其按臨諸司皆拱聽者改僉河南河北提
刑按察司事臺檄檢覈中興鈔庫中興故李夏都
隸隴右河西道憲令竟事始聽東任公又走沙莽
徃復近萬里半歲而歸與其副程思廉發數縣民
完堤以捍河水罷當暑賦民牛車轉粟入淇又改
僉燕南河北道提刑按察司事趣裝其考已疾行
至衛而卒公與兄楹即藏衛西輝之蘇門周卜村
南原而其妣亦疾乃朝夕哀死事生即教授于輝
明年燧召直翰林咸其毀瘠骨見衣表焉哭之子
其徒數十人拜庭進退朋讓賓敬之道囂囂然也
生成法也為嘆曰嗚呼燧亦先生弟子者何嘗不
以善及人如是明年燧疾滿告歸鄧而故司農卿
侯爵託語考隆或河南北農副制下必黑練以出
世議隘薄自便非時燧傭車過衛不可畱不得身
見為書語其然聞方督課有績其妣亦卒附其考
墓竟以是謝所事以至元己丑秋八月三日年四
十六卒苦廬嗚呼學可以範世行可以礪俗而已
是哉夫人賈也以燧平昔善公錄河南北道勸農
副使苟宗道埋辭求銘神道每一讀之一投淚擲

筆數年終不能叙其事去冬以史事又召入翰林
過輝夫人祈世母夫人爲言持幣泣請且使其子
羣馬與游其門者庭拜燧還其幣曰吾無荅吾亡
友者以是佐刻石須嗚呼非公仁義行家能使婦
人如是切切惟恐沒其夫子一善可白賢已公諱
棟考天祿錐官而不顯居頤樂堂號頤樂先生唐
白居易家狀云白姓家太原者楚熊君孫勝白公
見殺於楚其子奔秦孫乙丙與裔孫起爲秦將封
武安君賜死杜郵始皇思其功封其子仲太原公
豈其苗裔耶銘曰

聞古五十年不稱夫公是不盈天道未曉學不篤
耶得譽先師道不行耶

裕廟嘗知職不舉耶三憲著效力不本耶耕播之
教況冠獬角敢言人難彈射柄臣聽者毛寒猶枚
其外未及其內視親于喪觀婦于介靡一匪善靡
一可涼非我友私月旦章章嗚呼白公耳孫猶令
其貫古松歲遠滋勁士不盛位而盛吾賢盛位者
衰盛賢日延有方其趺有刻其首碣石阡隅千祀
無朽

河內李氏先德碣銘

姚燧

至大庚戌郇王府長史兼經歷典食司與所部人
匠都府官李惟恭持其鄉士席雲漢狀其祖潤文
王使懷之利用庫日民調商征之入吏祿公須之
出不遺於受不僭於發如他人侵蠹以溢其家負
而責償罪沒產者皆無之與交人以誠御下以寬
~~禮賢樂善者求其件~~燧曰管庫之官則古委吏
亦下士也所可重者豈專由孫貴耶蓋郇王之考
初尚主

世祖再尚主 太宗自稱晉王克用老同孫為置守
冢數十戶於鴈門禁民樵牧由分地在高唐即是
進爵為王世居靜安黑水之陽為廟以祠孔子元
貞始年表賀聖節獨書漢字庶其尊禮斯文者惟
恭今臣其子觀其所事者賢若不可辭矧有大此
者懷之為州

憲宗大封同姓初國
世祖于秦以戶寡益封之至元之末以封其孫
順宗既之國未至疾返 成廟賜名懷寧以王
今聖時方撫軍于北

皇太后儲皇往居者二年則懷為三聖龍潛之地
傳曰小國之君當大國之卿為下士是邦者當宜

何哉則君善職管庫者有不必言矣卒以大德乙巳三月十有八日年六十七垂絕猶念惟恭不置曰吾平昔鍾愛是孫今遠宦數千里不及聞吾願言可憾也哉妣王後二年亦卒一子從鼎從信孫則惟恭其長初由王府郎中羅忠國使懷聞其好學慤有立志遂與偕北即壻其家進之於王王甚禮之言無不從事必見咨妻卒賜楮緡二千五百為娶元氏子季惟寅銘曰

荀卿子言臂非長升高而招所見彰斯若可用為君方惟懷為州河之陽實為三聖淵龍鄉其間下

士雖守藏或小大國君卿當其貴可參攀鱗翔況復有孫翼賢王遠塞而近孔子堂仕優學以能自彊何畏潛德無輝光

故提刑趙公夫人楊君新阡碣銘 姚燧

維蔚州蜚狐趙氏系不可遠本繇今江西湖東道肅政廉訪使秉政而上推得二世祖崑金帥府評事卒葬其鄉二子珪瑁珪將萬夫戍蜚狐後遷刺蠡州畱瑁在鄉守舍天馬南牧度形勢不支倡縣民以城下之從太師國王徇地至蠡其刺猶城守礮殺王悍將蕭大夫王恚欲阮城公請以身贖母

兄死王哀之併全蠡民以戰績每最進冀州元帥
虎符復推與其兄廷議多其悌讓改公冀州軍民
總管別錫虎符入覲受知 睿宗承制監易州再
遷行省中都金平監中山府當 憲廟世

世祖方淵龍收召聞望之臣求治道之宜今者置
經略司于河之南宣撫司從宜府于陝之西行部
于秦都漕于衛東西二千里道不拾遺而邢則今
中書右丞相之祖封國政施民散最號弗治求潛
藩制官惟歲入其貢賦為置安撫司後邢易為順
德升州為府乃以近故太師廣平王從祖脫兀安
與公為斷事官位安撫上公年盛強俾與關國勳
臣苗胄為友則潛藩期仕公者已不小矣

世祖踐極制監真定路位總管上俄遷順天路宣
慰使肇置四道提刑按察司以公使燕南河北轉
使河北河南累章請老不可年七十九始聽歸卒
年八十三以監中山有田朱固鄉不返墓飛狐即
塋是鄉堯封原亦昭時崇顯壽考人也夫人既同
享有其樂公當不恙亦以官植業順德盡析秉政
夫人從養及子貴食其祿以終年八十二不及公
才一年何壽考萃是一門哉因惟女子子天父天

夫者也父不能必子之貴能之者夫子焉耳而難其全今之儲才將相係望海內者每在乎風紀之官夫人以提刑使之妻而母廉訪使詩曰教誨爾子式穀似之彼奕葉襲芳不隕世德夫人之功亦鮮儷哉古邦君之妻邦人曰小君禮士喪妾不得匹其夫必曰君妻曰女君後世封羊祜妻爲萬歲鄉君則令甲郡縣君之原可爲今不敢氏夫人而君君之凡其不反葬中山即別塋順德李馬村若不同穴記稱合葬非古也因求之吾家雋州都督文獻公開元宰相考也葬陝之峽石百官咸會焉

及妣夫人劉卒則墓萬安山萬安嵩高西趾去峽石二百里耳以唐相之貴月入俸錢三千緡有力不足於至哉則不合祔者亦從古也今秉政斯兆未必始亦由此燧以其於古有徵爲發之夫人生三男二女男秉政秉彛秉衷女適焦簡周某孫男女九人秉政又曰吾他日亦域是嘗聞諸師古人不諱死惟不趨取死之途今之人鼎鼎焉惟死途之趨復苦諱死亦惑哉如師之言則秉政不徇流俗語身後事於其生亦庶幾古達者也銘曰襄國所直趙商魏北其西太行冀方四塞求田惟

良宜莫如襄衍沃平平千里其疆生家其間沒即
斯瘞矣取日者風水焉泥孰陪平原如阜而尊左
之右之昭婦穆孫受厚其門既壽既祉流澤淵淵
未艾來只世生顯人如夫如子

故金甄官署令魏府君墓碣銘

姚燧

燧還吳中過廣陵日今嘉議大夫行臺御史中丞
初請曰吾祖靖肅公顧言以吾曾祖甄官署令即
死所藏亂離失其處他日必虛爲立先塋石載其
無使吾先人魂遊徬徨無所於歸而一善之或
遺也子義爲銘隨又遣其少子可亨挈舟廣陵五

千里追之襄陽不及返而及之鄂授其考所輯家
塾記曰掇是事銘嗚呼確哉遠而勞焉迺本之曰
魏氏繇唐相知古子林刺朔州子孫居桑乾桑乾
爲今弘之順聖遠有延恕者生中奉大夫守成中
奉生通奉大夫餘慶通奉生堯峇館酒使子貞堯
峇實生甄官署令君諱允元改德元字信之甄官
生進士特賜及第勞特賜生思廉即記家塾者思
廉生初初生翰林修撰必復可系者是九世其大
子金繇堯峇弟資德大夫參知政事柱國鉅鹿郡
開國公子平相世宗致治隆平祖考中奉通奉再

世官皆以公貴贈兗峇及于隴右令景元甄官與
逸其諱一人再世官皆以公貴廢君始監順聖酒
改弘州酒使鄧州權使抽稅設防有方與宜平不
增歛姦無走匿額有贏籌民不苛之入副堂厨庫
又爲使改文繡上林兩署令同知易州入令裁縫
署改令甄官署以卒年六十三官止廣威將軍夫
人高氏七男笏琬瑜琦玠璠玉琦太中大夫行部
侍郎玠朝列大夫延安司獄璠翰林修撰今謚靖
肅公與特賜皆以明經進士官琬懷遠大將軍耀
州庫使瑜監豐利酒皆廢官玉進士未祿卒二女

一歸同知荊州節度使事秦德美一歸其鄉右姓
孫氏君究心本富計田疇第舍牛馬雜樹直可爲
錢千者五萬歲入粟爲石者三萬歲抽五十一爲
七子求師取友須令節休旬大集衣冠令枚誦所
業覈其進惰已則鴈序方前侍飲前修聲輝耳目
漸涵化淪其心絲是成德達才多萃其門章宗甚
嬖李妃夫人視妃母王姑也數召通籍禁中不可
後從秋獵易州君方除道橋諸水復召曰吾思與
若舅第語久矣終不能一致今行之所在是而夫
子俸是便且時也無終見避之深夫人以君出不

敢專行俾子瑜請之亦不可曰是家膏也親將汚
人人有爲不善者不畏取戾府縣惟憚君知兵興
下令急甚敢有舍奴婢亡命不告者臯及其鄰人
猶刺其傭輕私役之覺則殺以滅迹或致大獄君
時鄉居聞有出入非常者召問得情嚴其錮防書
致其主歸之約示薄威以懲其再無殘其生終不
語其主以獲之誰舍所也比卒免家僮父故者民
之作詩與斯世訣沐浴冠衣按日而逝君之孝友
天得非學其使堂厨以鉅鹿公子叔元未仕曰大
臣子故屯其膏澤不見及耶三求推所居官縣官

以故事無有不可又恤其無子以靖肅後之靖肅
又無子顧言後初則甄官子孫世世圖報鉅鹿者
何如也其家塾自序曰繇吾季曾鉅鹿輔政茲降
修仁潔義可謂曰父仕之達者列品而九不過中
中天嗇爲報將待夫後之人耶最初之仕外僉提
刑司事爲副爲使入爲監察御史治書侍御史侍
御史御史中丞三十年間風憲之官無不揚歷司
清議者猶大有期曰將不已是於今嗚呼自序君
其知子哉矧必復於靖肅公克世其官可大可久
與亨學行疑疑可述銘曰

反覆觀先民吁可哀積充報銜身期後來門令容
駟馬堂三槐必貴於天者如取懷惟中奉亦然祥
用獄至鉅鹿再傳旣鈞軸官不私其子甄官承承
三遜其季叩墓謦又仁歟之祀修撰繩官以祀比
言祀則大以今修撰孫後者再小宗旣顛蕃大宗
賴藏偶失故所魂依依祀之從先墓來如歸廡廡
桑乾原終天地碣孰華其文太史燧

翰林修撰致仕董生八生墓碣銘 元明善

揚州總管王君結余友也駟過其家中山授余崔
助教詠狀曰此結師也幸公銘俾諸孤刻之墓神

道是不沒吾師矣余以義不得辭諸總管則取

狀讀之曰先生姓董氏諱朴字太初隱居五十年
壽八十五以卒嘗爲陝西道按察司檢法太史院
主事俱去之集賢院臣奏其賢特授翰林修撰承
務郎同知制誥兼國史院編修官致仕先生之學
蓋明理爲本篤行爲要最其所至則文雅安恬者
也其教人也善因其才而究其器故千里間化之
學者不之字號曰龍岡先生先生朔州人曾大父
遷邢著戶版大父資祿妣韓父彥成妣李農焉先
生穎異過人學於樂舜咨劉道濟遂以儒顯娶張

生三子一女先先生卒二十七年長子慶雲次子慶元慶隆女適張德祿孫男四曰壽寧祖寧叔寧蘭寧孫女二曾孫男三曰長孫昶孫澤孫曾孫女三先生卒之歲爲延祐丙辰月爲辛卯日爲乙亥墓之日爲己丑其兆在唐山之陽云夫含光蘊秀蹈高遵素惟潔身之士乃能行之惟有道之朝乃能容之跡其臨蒞銘之也宜辭曰
龍岡之支淵淵以池種蓮于茲面我茅茨池水之清比其風靈蓮花之馨配其德徵猗嗟後生于考于評仰止斯銘千載而鳴

監察御史韓君墓銘

張養浩

君韓姓諱克昌字勵夫汴之太康人其自世遠不能系大父贊隱德不耀父椿宦至洪水巡檢君甫冠以孝廉辟吏河南陝西二憲司尋登掾刑部歷臺若省論事据正不撓所至表表有聞後刑部缺主事衆咸屬或謂資淺執政曰用人耳遂授君其操履益確嘗有兄弟五人爲盜或論爲強於法皆死君閱其牘愀然曰弟從克者也今若是不幾族乎乃議最幼弟減死上之省可其讞闔部嘆服其他指迷趣緩稽舊蔽新凡所當爲靡遺餘力時長

官有媚其顯者君曰上領其槩下任其繁此自通制余何顯然以疾屢在告衆史軫其憊不煩以細惟重辟則正是焉久之懼事墜職弛舉浙西廉訪司經歷丁某自代用是改承務郎太常大樂署令甫上拜監察御史進儒林郎雖力疾就職未嘗辭劇避難建言如皇子師友非人起居注不舉其職覈徽政成按言國庠學規省官節財審令慎罰數事皆剴切時務爲慮深遠未幾河東憲司有下廟上者臺臣爲失風憲體奏君卽治以訊慨然趣行或以疾止之君曰御史與散員不同吾心視常人

亦異況死生命定顧可以微恙使吾有不職罪耶乃決意往回及半途病果劇以延祐元年八月二十一日卒官于威州陘山驛春秋四十又三訃至公卿大夫士無不悼惜娶董氏一子元善從仕郎濟州判官君性端介峻儀宇讀書務措諸實用論議踔厲臨政稜稜有風望外若自用而理所折衷則舍已從人如弗及故不知者頗以爲狷余爲右司都事時君掾省以嘗共事故知之爲深嗚呼惜其年位不究而止乎此也雖然湛盧豪曹不必陸剗象兕而後知其利肅霜要褻不必路極九有而

後知其良古人韞竒擢異囿於小官而不獲伸者何限遽曰其才已是可乎哉此余所以噐君之賢而又軫其施不廣且悼夫七勲不及書也然有其具而未盡其用則有非我所能必者庸何傷哉庸何傷哉是爲銘

吏部員外郎鄭君墓碣銘

虞集

鄭君諱大中字義甫早學於鄉校稍長推擇補中書戶部令史歷詹事掾史出官登仕郎納綿總管府經歷

仁宗皇帝在東宮時嘗因事得見

仁宗偉其人目左右問其姓名是時

仁宗愛尚文學常不次擢拔材儁於衆人之中人亦率更名所居業以自傳會驟得顯用者甚衆而君略不少自衒鬻才得爲中書掾掌選調陞吏部主事以廉敏爲丞相噐重而君丁內艱去國服闋除東平路推官終更又除嘉興路推官甫召爲吏部員外郎官奉政大夫且嚮用出調廣東官於江西歸至京師以疾卒泰定二年七月二十一日也享年五十五公材行過人視當世顯用者未見其遽相遠數寘省部要地皆不得久又常以文書爲

職業事無專制獨爲推官時東平屬縣東阿誣民
爲盜者獄具矣理出之壽張童子以杖爲戲誤中
人死縣論以殺人之罪君持不可刑部是其議山
東大水民多徙死檄君賑給者多全活嘉興浙大
郡獄尤夥君決遣之數月迺至無事憲府以其狀
薦之其治績可推見者如此娶何氏封真定縣君
三子重承事郎太常禮儀院太祝量野未仕三女
皆幼重爲國子生時與今史官蘇天爵爲同舍而
集爲博士故其墓君於真定之三家市也以天爵
所述狀來請銘按君之先世本契丹也具族石抹氏

後改從漢言曰蕭氏者是也有仕金爲謀克謀克
者金人之言謂帥百夫則冠以謀克爲官名云貞
祐南遷以其兵戍洛正大庚寅國朝兵至戰死其
配楊氏亦以兵死而其子顯七歲矣爲千戶鄭公
所得鄭異其資不凡以歸與妻霍夫人鞠育之千
戶公竟無子而歿遂以爲子因姓鄭氏而母事霍
夫人終身有恩禮是爲君之考以君貴贈奉政大
夫樞密院判官驍騎尉真定縣子妣尹氏贈真定
縣君而君又有兄大章中順大夫濟南萊蕪鐵冶
提舉與君齊名而皆不究其用具書之俾後世知

鄭氏有以石抹氏改者自真定諱顯者始其銘曰
氏族之興氣禪體承似續祠烝匪信曷徵維鄭有
良吏維遼是自銜德懷誼不敢叙其紀爰著因始
俾永詒孫子

國子助教李先生墓碣銘

虞集

東明李先生爲國子助教時集後至與先生爲同
官先生所居齋諸生多年長豪俊之士先生朝夕
授之經愾歎有程方重純篤授業者知以質行爲
貴集少先生十餘歲嘗觀其不可及以自勵方是
時故平章政事高公昉故翰林學士元公明善皆

先生鄉里雅敬先生而高氏又與先生家連姻二
公赫然用事于朝先生歲時往來之外未嘗有所
私謁處士張子素好立竒行自表樹匏冠布衣刻
口言天下事常傲視一坐人亦少先生數歲先生
以鄉里待之甚勤至子素益加敬愛嘗從駕上都
分教諸生之在宿衛者比還中道驛吏告乏馬以
牛車進先生食已攝衣升車無一言驛吏更相誚
以爲不當靳長者而從者亦愧服先生居成均五
六年有傳其子好文所著古文數十篇至京師故
御史中丞張公養浩與元公皆以文學自任一見

驚異即列薦之于朝先生慨然曰斯文之事屬諸
吾兒可也至治末集自江南召還則先生已去世
而好文登進士第歷史館奉常復得為同朝集見
其深靖有學未嘗不歎先生之有子焉好文來言
於集曰昔先君子之在朝也招撫府君之墓得姚
文公為之銘鄆城府君之墓得閻文康公為之銘
先君子歿而諸老盡矣同居成均者惟子在焉敢
請銘集誠不敢附二公之後而與先生父子厚善
其敢辭按李氏世居單州諱訪金義軍提控生子
聚金亡徙大名之東明大帥阿朮魯版授軍民招

撫使生庭玉鄆城令先生其第三子也諱鳳字翔

卿幼嗜學休沐不廢從鄉先生孫曼慶學詩久之

曼慶謂先生曰詩吾無以加子矣其為義理之學

乎先生乃屏絕金末律賦舊習而究伊洛之遺書

寒暑不懈嘗蠶蠶未熟而臨卷有得不知金之焦

也初從太史氏測景陽城雷居嵩頰間讀書三年

而後歸為郡學錄鄆城病還東明遠近學者從之

常以百數稍遷廣平學正大德丙午始除國子助

教在官兩考餘有司以常格除臨朐主簿到官未

久即去之延祐丁巳八月己酉終於家年六十有

四以好文貴贈從仕郎郊祀署丞加贈奉議大夫
太常禮儀院判官驍騎尉追封東明縣子夫人王
氏故太醫使康懿公安禮之從子也通經史善相
其夫教其子以有成初封宜人加封東明縣太君
就養京師安貧而篤於禮至順二年十月甲子卒
年七十有七子一人好文也女適王思柔孫三人
涿浚潞女孫二人皆幼好文奉母喪還東明將以
三年三月丁酉合葬先生夫人于黃頭里之先塋
先生雅好巖壑而所居遠於山得竒石積諸齋前
以爲山日對之吟諷先生著書甚多而不甚存藁
所存者有詩數百篇曰西林集西林者先生所居
也銘曰
先生之容鬱乎山岳之蒼蒼先生之懷浩乎河海
之泱泱用世不多斂而歸藏子以文興于先有光
我表西林來者不忘

征行百戶劉君墓碣銘

馬祖常

趙郡蘇天爵述其外大父劉君行實乞銘於馬祖
常曰先妣武功郡君昔安樂時念其父不忘懼其
善不傳而名遂泯泯也嘗以語天爵迨先妣棄世
外大父終不得銘天爵蒙慈母之教誨粗有樹立

於時圖所以繼親之志者天爵其可不勉祖常曰
孰無親乎孝於親之身者尚矣矧又能思廣其親
之志乎乃爲之序而銘之序曰劉君諱成字立甫
貌魁岸竒偉讀書涉大義不事章句歲壬子國家
初籍民田襄鄧間君與其兄俱在行中兄弟勤穡
事每代兄作勞田官稱之久之從伐襄陽先登授
首夫長嘗率數十騎略武當宋邏兵四合屢突圍
出皆不勝或欲降君殺馬爲食居數日不降宋人
疑其有誘各引去衆服其勇丞相伯顏將大軍渡
鄂州江命別將阿里海涯率萬戶張興祖軍分徇

湖廣地君復與其兄從破羅飛文才喻周隆黃必
達張虎諸軍薄靜江兄中瘴毒死君扶其柩而北
葬既襄事輒屏迹田野課僮種樹畜牧耕桑衣食
以自給於湖南遇兵俘一儒生黎姓用金購之曰
此儒生不善力役歸我我將俾爲弟子師果同歸
教諸子於鄉餘所全活者衆此儒生其一也享年
八十有四以延祐二年正月十又二日卒葬真定
平樂原先考萬戶府君 考諱義起行伍元帥史
天倪辟署權黑軍萬戶 會副將武仙殺元帥叛即
從元帥弟丞相天澤擊走仙轉戰兩河平金有功

妣夫人孟氏夫人董氏前君廿六年卒子二人曰
寓曰海孫二人曰允中曰弘中女一人故中憲大
夫嶺北行中書省左右司郎中蘇志道之夫人追
封武功郡君今奎章閣授經郎天爵之母也女孫
四人一適奉訓大夫萬盈倉使李恕一適張林一
適侯閻其一幼也世本歷城人金季山東河朔兵
興賊雜蹂菹醢其民獨真定城完君之考因占籍
焉而今爲真定人者自其考始郎中蘇志道年少
日君識其爲令器以女歸之後其甥天爵又以文
學進有官于朝孝而能成母之志俾其外氏之官

闕世次刻於金石者竟賴其力焉銘也無愧銘曰
振振劉姓考室真定挺身堯墜而官弗崇雖則弗
崇勇也匪躬斬馬啖卒出金購士其謀則懿其惠
則侈其迪其啓以多孫子女實命婦副笄封君出
甥維彥日肆於文克表外氏績茲勞功刻詩墓門
維以亢宗

監黃池稅務王君墓碣銘

馬祖常

王君元父既歿之十一年其子國史院編修官沂
茹哀請於馬祖常曰子與予同登進士第又同官
于朝先生世以迄于其行誼無愧而終齟齬

以不合於時者子能知之其宜揭以傳後者子宜
爲文沂之述諸狀者子宜加詳焉按王氏出姬姓
周畢公高裔孫萬事晉更十世得列爲諸侯滅於
秦子孫徙雲中地今之弘州六世祖遼戶部侍郎
山甫始著於家諱子三人曰元節密州觀察判官
生詡金左司員外郎以文學稱蓋世閥遠矣曾祖
諱銳金尚書戶部員外郎祖諱國綱金監察御史
使河中詰總帥完顏仲德戰敗死節考諱振艱關
轉徙占籍真定力學底行起家至江南淛西道提
刑按察司經歷配丁氏有子三人長諱宗禮季諱

宗義皆早世仲即君諱某幼自知問學侍經歷君
居浚都爲士子經師尤長於詩詞試浚都文學掾
辟江東道宣慰司令史會使專恣他吏恐諛弗敢
仰視君每以義持之屬歲澇饑群無賴起竄盜
效相蔓民不輯寧宣慰司遣君覆視還請蠲徭發
廩以賙賑隸盜遂息進將仕郎宣城縣簿縣比歲
供玉面狸四十畢采不獲則轉購他邑糜貲毒民
君至請悉罷貢姦民有走逃田賦者歲取償里胥
吏循格不究君一正其籍乃建孔子廟築壇崇社
春秋飭其牲器以與邑人行事川有梁田有溝道

有寓望吏徒有畏而弗肆民知有政而趨功監司
郡守爭爲鼓譽江浙行省屬錄寧國太平二郡囚
又屬覈考江陰錢穀他州縣訟累歲不決者多以
屬君所試悉有能聲江陰盜有枉爲脅誅者吏黨
按之既誣服已君反覆得其情爲具獄白行省事
上中書移刑部刑部允君議遭脅誅者得免死南
陵縣僧以貲雄持縣短長堰溪水溉私田霖潦水
溢則漂沒崩蕩邑人訴於縣吏懼莫能施行君詣
視毀之老幼至撫手拜慰且曰君出一鄉於魚蟹
矣未幾擢江浙行中書省掾曹無畱事適浙西廉

問官與君素同里少持氣不相下頗嫉君君又不
自詘以希合乃風旨豪梗羅織君以是坐誣免不
辨起除瑞州平津庫使不就改仁和鹽場司丞又
不就家居數歲又改除平江行用庫使州縣趣曰
君所與游盡一時知名大夫士咸燭君寃而君終
不自訟就使終不赴孰與君直乎忍是一往而無
變君素守以流於物將推歷君之迹當不誣矣寧
無爲君采於有司也君不獲已就官久之自免歸
階前資遷承事郎監黃池務稅以至治三年五月
十三日終于家享年六十有七以其年月日墓於

某州某里之原要把氏潁州判官時之女男三人
澄沂洙女一人適浙東廉訪使待其同朝之子通
孫男二遷善崇善孫女二人皆幼君甫冠即自立
勤苦爲文章履其身以莊儉亦未嘗過爲崖機其
官業行已之略一皆自信不妄計進取少顧時人
之所爲而亦以此稱之然亦以此嫉之至大間嘗
爲書言任人別邪正養民重守令法不可輕更令
不可輕出期少施於朝廷而書不果上執政聞君
名私使人致款欲官之錢監君知不足與共事卒
謝去後果敗而君益畜其學以老不克用鉅公聞

人累薦君才宜理劇文學宜館職皆不報屏居錢
唐詩書尊姐詠詠調息偃泊然無豪髮世俗慮撫育
諸孤子姝誠惡天至而急人之窮獎人之善汲汲
焉猶負宿諾而抱隱痛皆他人所難而君爲之不
知爲有德尤人之所難也其所著有政要書十二
篇陶詩注三卷詩一卷嗚呼天興之變國土虜裂
焚剽翦雜不百年而金之名家善士之子孫遺子
不數戶矣初御史君以直節死人惜其未能大用
於時夫固知經歷君之起王氏也經歷君位不配
其德以歿于今凡幾年而承事君又斥不用君子

悼曰不幸然孰知後世之將昌且久歟今所以進士入官有古學方嚮於用而克濟其美於未艾豈其碩大光顯又將在茲歟是宜爲銘銘所以使後世爲善者不怠也銘曰
冕弗媒也玉有珞也一擯不用有子哲也彪炳而文立其嶸也載善於銘行安轍也

處士甄君墓碣銘

宋本

應奉翰林文字真定蘇天爵伯脩父持所著處士甄君行狀求銘其墓曰君鄉之先達諱昌祖字茂先師侍其先生軸交秋礪三公憚俾天爵狀以謁

銘子者其子恒志也銘曰

舜胄氏甄代遐邇君世有繫遠益略茂先昌祖字諱錯無極徙恒遂地著曾祖公亮德潛爍祖讓事金刺嵩洛考用致位民部幕妣劉繼王淑相若君讀六經得大約母王滄瀄老致樂築亭訪山在負郭木石與居隱操裸師軸友憚敬不謔言倍行過期救藥經史傳集浩以博重屋下冊示尊閣修名疇然日孔炤蜀憲聘以養却戊申月正體魄落歲六十二瘞諸俗儷代之王賢以孀胤恒補吏晉臬擢女章變兮死未灼子子克敏齒踰弱王侯不

國朝文類卷第五十五
事斯道卓幹母之蠱子職恪懿君學易協準矧顧
親小祿辭不諾惟古逸遺名不鑠賴士載辭傳磊
砢抑本茲銘不已作誰之言者蘇天爵

國朝文類卷第五十五

